

1616. Den 26. vmb mittag hatten wir die höhe von 57. grad/ vnd wähere der windt vom Westen vnd Sudwesten ganz vngestüm. Dieses vngewitter wehrete denselben ganzen tag vnd Nacht/ also/ das wir nicht mehr dann ein kleinen Segel konten oder dorfften auffsetzen. Wir lieffen Sud an/ vnd sahen Nordwest von vns landt/ nach welchem wir doch allein mit eingezogenem Segel/ wegen des grossen winds/ zu-
fuhren.

Den 27. waren wir auff der höhe von 56. grad 51. minuten/ litten grosse kälte/ wegen Hagel vnd Regens / der windt war West vnd Sudwest/ fuhren erstlich auff Sud/ darnach auff Norden zu/ mit eingezognem Segel.

Den 28. wehrete das vngewitter noch / der windt war erstlich West / darnach Nordost/ wir schiffen erstlich Sudwärts/ darnach West vnd Sudwärts an/ waren auff der höhe von 56. grad 48. minuten.

Den 29. gegen morgen hatten wir Sudosten wind/ vnd setzten vnsern lauff nach Sudwesten. Nach mittag wurden wir zwener Inse'n gewar / zu welchen wir vmb mittag kamen/ konten aber Sudwärts vmb dieselbe nicht kommen/ sondern mussten wegen des winds / auff der Nordseiten neben hin lauffen. So viel wir aber abnehmen konten / waren diese Inseln ganz vnfruchtbar/ voll grauer Felsen/ vnd liegen vnter 57. grad von der æquinoctial lini gegen Süden. Wir nenneten sie Barnefelds Inseln/ fuhren von dannen West Nordwest an/ vnd sahen gegen abendt wider landt Nordwest vnd Nord Nordwest von vns liegend/ vnd ist das landt an der Magellandischen Straß/ streck sich gegen Süden / ist sehr hoch vnd bergig/ voller schnee/ endigt sich gegen Süden in ein dünnes vorgebirg/ welches ligt vnter 57. grad 48. min. ward von vns das Capo oder vorgebirg Horn genant. Dozumal war es gut wetter/ vmb den abendt erhube sich der Nordwind / mit welchem wir nach Westen zu fuhren/ dahin der Strom mit hohen Wellen starck gieng/ auß welchem/ wie auch der blauen Farb des Wassers/ wir gänzlich abnamen/ das wir nunmehr ohne zweiffel/ ein newe durchfahrt funden hetten.

Den 30. hatten wir die höhe von 57. grad 34. minuten.

Den 31. kamen wir auff den 58. grad / vnd nachdem wir das vorgebirg Horn fürüber gefahren / konten wir kein landt mehr sehen/ sondern begegneten vns grosse vnd hohe Wellen auß dem Westen / daher wir gänzlich vermuhreten/ das wir vor vns kein landt mehr / sondern ein weites offnes Meer hetten / litten aber wegen des vngestümnen wetters grosses vngemach / vnd mussten dann hie dann dahin lauiere.

Februa-
rius.

Den 1. Februarij/ wiewol es allda vmb selbige zeit mitten im Sommer ist/ war es vber die massen kalt / vnd fuhren wir wegen vngewitters / mit eingezogenen Segeln Nordwest vnd West Nordwest an.

Den 2. hatten wir die höhe 57. grad 58. minuten/ vnd befunden das die Compass Nadel gegen Nordost abwicke bey 12. grad. Sahen viel Seemewen vnd andere Vögel.

Den 3. waren wir vnter auff der höhe 59. grad vnd 25. minuten/ war gut wetter/
der